





1691

21^e. fev. 1712.

107

LETTRES

DE MONSIEVR DE
LA TRIMOVILLE, DEVX
au Roy, vne à Monseigneur le
Prince: plus vne autre de mon-
sieur de la Force à sa Majesté.

*Sur le sujet de l'Assemblée de la Ro-
chelle.*

A LA ROCHELLE,

M. DC. XXI.

Case

F

39

326

1621 Ld

THE NEWBERRY
LIBRARY

*Lettre de Monsieur de la Trimouille,
au Roy.*

S^{I R E,}
Aussi tost que Messieurs de Rohã, du Plessix & moy, auons entendu que V. M. n'auroit point desagreable que nous nous trouuassions ensemble pour moyenner par commun aduis, qu'elle receut consentement & satisfaction de la part de ceux de la Religion, Assemblez à la Rochelle: Nous auons estimé pouuoir assurer V. M. n'auoir rien reconnu en leurs intentions, qui s'escarte à leur esciët du respect qui luy est deu, s'estans les vns, persuadez qu'ils estoient fondez en la volonté de V. M. en ce qui est de la conuocation de ceste Assemblée, & les autres y ayans comparu de bõne foy pour le presenter aux pieds de V. M. avec leurs requestes tres-humbles. C'est pourquoy, Sire, Nous la supplions tres-humblemēt de ne souffrir point que les choses soyent pressees à la rigueur, ains en desployant vostre bonté & benignité sur eux, passer par dessus le mescontentement qui pourroit estre, pour vouloir entendre leurs remonstrāces, par la bouche des Deputez de vos subjects de la Religion, residans sur le bon plaisir de V. M. prez de sa personne: Moyennant quoy, Sire, Nous nous assurons que V. M. recognoistra, qu'ils ne desirent plus grand'heur que sa bonne grace, & leur continuera son accoustumee equité & iustice. V. M. est si haute esleuee au dessus de toutes les considerations

4

qu'on pourroit alleguer la dessus, que le bien qu'il vous plaira leur faire, ne pourra estre imputé qu'à sa debonnaireté: Comme de fait aussi, il n'y a celuy d'entre nous qui n'ait matiere de ressentir, qu'entre tous vos sujets, il ny en a point qui soyent plus interessez à la conseruation de vostre auctorité: de laquelle nostre manutention dépend vniquement. Je sçay que ceux qui ont plus de cognoissance que moy, des miseres passées, ont fait entendre à V. M. l'Estat dont les Prouinces, & les calamitez des guerres ciuiles ont cy deuant agité vostre Royaume. C'est pourquoy ie m'en suis retenu, & si ie suis honoré de ses commandemens: Je tâcheray de luy tesmoigner de plus en plus ma fidelité; Et cependant ie fais vne dépesche ausdits Deputés de la Rochelle, à ce qu'ils ne faltarment point sur la nouuelle qu'ils pourront auoir receüe de l'indignation de V. M. leur faisant esperer, qu'elle daignera appaiser son courroux vers eux, dont nous ayons tous matiere de louer Dieu, & moy encore, en recognoissance de ceste grace, de me continuer à iamais

SIRE,

*Vestre tres-humble & tres-obeissant
subject & seruiteur,*

La TRIMOVILLE.

*de Tonnars ce 23.
Feurier 1621.*

S E C O N D E

*Lettre de Monsieur de la Trimouille,
au Roy.*

SIRE,
Vostre Majesté a deigné recevoir celle que ie luy escriuis du vintg-troisiesme du passé, avec vne si grande bonté, qu'elle me donne hardiesse de retourner vers elle, & luy redoubler en toute humilité ma supplication, à ce qu'il luy plaise favorablement entendre les tres-humbles requestes de ses subjects de la Religion assemblez en la ville de la Rochelle, à elle presentez par les Deputez Generaux de nos Eglises, qui ont l'honneur d'estre pres d'elle: Ce que V. M. n'imputera point, s'il luy plaist à aucune presumption, mais partie à la confiance que i'ay, qu'elle ne se sent point importunee, la où elle recognoit en ses seruiteurs vne droite intention, en ce qui est de son service, partie aussi à l'impatience qui me tient, de me voir deuelopé de toute autre pensee, que de tascher de meriter les bonnes graces de vostre Majesté auprez d'elle, & aux occasions qui sembleront se presenter pour sa grandeur & gloire: lesquelles, SIRE, i'oze dire à Vostre Majesté, estre recognuës de telle importance, que quand elle relachera quelque chose de la severité, pour les embrasser à bon escient, outre ce qu'elle obligera toute la Chrestienté:

Tant s'en faut que rien deperisse de son auctorité, qu'au cōtraire, en se surmontant elle mesme, en la vertu qui de plus prez l'approche de Dieu : elle aura redoublé en tous ses subjects de la Religion, non le deuoir seulement de fidelité, mais le desir d'une entiere obeissance. Pour moy, SIRE, Il me tarde que ie ne rende à vostre Majesté, de celles qui sont imprimees en mon ame, dont elle ait matiere de cognoistre,

SIRE,

Que ie suis, & ne peut estre autre que

*Vostre tres-humble, tres-obeissant
& tres fidelle seruiteur & sujet*

La TRIMOVILLE.

De Touars ce 1.
de Mars 1621.



*Lettre de Monsieur de la Trimouille,
à Monseigneur le Prince.*

MONSIEUR,
 J'esperois d'apprendre par le retour du sieur de saint Marfalle, que l'arriuee des Deputez generaux aupres du Roy, auroit peu donner quelque moyen de porter les choses à vn accommodement, mais voyant que le mal continue, & le temps m'ayant fait cognoistre, que le remede n'en peut proceder que de la prudence & autorité du Roy, & des sages Conseils, de ceux qui sont affectionnez à la conseruation de l'Estat: particulierement des vostres; l'ay creu que differer plus long temps à vous en escrire, seroit manquer à mon deuoir, y estant obligé par la fidelité esprouuee, que ceux de ma Maison ont tousiours eüe au seruice de nos Roys, à laquelle i'ay entierement succedé, par l'honneur que i'ay de vous appartenir, & par la

grande affection, de voir tous les sujets de sa Majesté, demeurer en la tres-humble & parfaite obeissance qu'ils luy doiuent, & son reigne cōblé de prosperité. L'Assemblée de la Rochelle a donné mouuement à ces agitations, les vns luy imputans vne obstination & desobeissance, & les autres estimans qu'elle leur est vn moyen ordinaire & accordé par sa Majesté, pour par tres-humbles supplications & remonstrances, luy faire entendre les inexecutions aux graces & concessions par elle octroyees à ceux de nostre profession: Ces diuers pensemens font que tout est rempli de menaces & de crainte, que la sedition se presche publiquement, laquelle augmente aux vns le desir de violer les Loix, & aux autres la peine de les voir violees, qu'on public ouuertement que la ruïne est resoluë de ceux de la Religion, qui n'ont esperance qu'en la bōté de sa Majesté, recours qu'à sa iustice, consolation qu'en ses Edicts: Je sçay combien vous estes jaloux de la conseruation de son auctorité, & quel soin vous auez de celle de son Estat: c'est pourquoy, Monsieur, l'ose vous supplier tres-humblement de luy faire entendre

201
rendre qu'il est de sa bonté, de les confi-
derer tels qu'ils sont, & non tels que les
ennemis de la paix voudroient qu'ils
fussent, & de sa iustice, d'escouter par la
bouche des Depputez generaux, leurs
tres humbles supplications & remon-
strances, plustost que la voix de ceux qui
la voudroient esloigner de l'affection
qu'elle à commune pour tous ses sujets.
Personne ne sçait mieux que vous, M.
que ceux qui cy deuant conseilloyent le
trouble en ce Royaume, auoyent pour
pretexte la ruyne de nostre profession,
mais pour bur celle de l'Estat, que le feu
Roy d'heureuse memoire releua ge-
neusement de la cheute, où les mauuais
Conseils l'auoit precipité. Souuenez-
vous s'il vous plaist du passé, pour oppo-
ser vostre autorité à ceux qui pour-
royent auoir le dessein; Considerant
qu'encore que c'est Estat ne puisse estre
entierement ruiné, estant en vne pro-
tection particuliere du Ciel, que sa Ma-
jesté agissant selon leurs intentions, ce
bien en reuiendra à ses ennemis, que le
corps en demeurera grandement affoi-
bly par le sang le plus pur qui se tirera de
ses membres. S'il estoit bien seant à vn

homme de mon aage : ou que vous ne
 preuissiez par les inconueniẽs, que d'or-
 dinaire les guerres de ceste sorte attirẽt,
 laquelle les plus courageux apprehen-
 dent, & les plus sages doiuent esuiter.
 Je prendrois la hardiesse de vous dire, que
 si pendant que nous ne serions point
 attentifs à boucher la voye qui se fraye si
 facilement au dehors, à l'oppression
 de nos alliez pour paruenir à vne tres-
 grande puissance, les armes de sa Ma-
 jesté estoient employez à la ruyne de ses
 sujets, les victoires luy seroyent dom-
 mageables par la perte de plusieurs fide-
 les seruiteurs, qui n'ont rien plus à cœur
 que de contribuer leurs biens & leurs
 vies pour la conseruation de son autho-
 rité : Je m'assure M. que vous aymez
 tant le bien de c'est Estat, & particuliere-
 ment recognoissez auoir tant de bons
 seruiteurs, entre ceux de nostre profes-
 sion, que vous procurerez volontiers, qu'ils
 rendant l'obeyssance deuë à sa Majesté, ils
 ressentent les effets de sa bonne iustice;
 pour moy tandis que cest affaire est in-
 decise, ie pense estre plus vtile à son ser-
 uice par deça, me reseruant à vous aller
 trouuer, lors qu'apres quelque bon ac-

II

commodement; ie pourray rencontrer
les moyens de vous rendre des preuues
veritables, que ie suis de cœur & de de-
uoir,

Monfieur,

Vostre tres-fidelle, & tres-
obeissant seruiteur.

Dela TRIMOVILLE.

De vostre maison
ce 23. Feurier 1621,

*Lettre de Monsieur de la Force, Sur
l'Assemblée de la Rochelle.*

SIRE,
SL'Assemblée de vos sujets de la Religion
qui est en vostre ville de la Rochelle, m'a tait
entendre comme ils ont donné cognoissance
à V. M. des raisons qui leur ont donné, tant la
liberté, que la necessité de se remettre sur pied:
& d'ailleurs, qu'ils ont chargé monsieur de
Fauas, leur Deputé general, de presenter à V.
Majesté avec toute submission & humilité,
leurs supplications & remonstrances: mais vo-
stre Majesté ne les a voulu recevoir, ce qu'ils
portent avec vn extreme mal de cœur, & a-

17
mertume d'esprit de faueur si preiudiciable au bien & aduantage de leurs affaires : Ils m'ont requis de ioindre mes tres-humbles supplications aux leurs, c'est, Sire, ce que ie n'ay peu leur refuser, estant obligé comme ie suis par conscience, & par Religion de compatir avec eux & d'entrer en partage, tant de leur aduantages & faueurs que de leur disgraces, & calamitez : non pas que ie vueille entreprendre de iustifier leur procedurè, car ie ne scaurois rien adiouster aux raisons qu'ils ont représenté à vostre Majesté & que i'espere tant de sa bonté qu'elle voudra les escouter avec la clemence qui luy est hereditaire, & les balancer avec la Iustice, qui luy est essentielle & particuliere, ce que ie pretends, Sire, c'est de me ietter avec vn milion d'ames, aux pieds de vostre Majesté, & la supplier avec tout le respect & humilité que ie dois, qu'il luy plaise de garder vostre oreille entiere, & non preoccupee pour ses pauures sujets de la Religion, desireux de iouyr de sa face Royale, & de participer en l'honneur de ses bonnes graces, & apres d'auoir agreable les paroles respectueuses de son tres-humble sujet, qui proteste en sincerité de cœur deuant Dieu, & ses Anges, que s'il est zelateur de la gloire de Dieu, il est ialoux de l'honneur & reputation de son Prince, s'il est affectionné au bien de son Eglise, il est passionné de l'amour de sa Patrie, & de l'affermissement de vostre Couronne, Sire: Ce qui me porte à cest excez, non accoustumé de paroles: ce qui oblige vos pauures sujets de la Religion, de redoubler

leurs tref-instantes, & tref-humbles supplications, ce qui nous tient aux vns & aux autres en perplexité, c'est la crainte que nous auons que ce rebut soit l'auancoureur d'une totale disgrâce, & cette disgrâce la cause de nostre finale destruction & ruyne, & ce de tant plus que ces apprehensions sont fortifiees par les menaces de ceux, qui peut estre, desireroient ensevelir l'Estat dans les ruynes de nos Eglises, & par les discours ordinaires des Catholiques Romains de vostre Royaume, & plus particulièrement de ce pays, qui publient haut & clair que vostre Majesté desseigne vne guerre ouverte contre ceux de la Religion, resoluë de les exterminer sans passion, & sans ressource, & bien que nous estimons que vostre Majesté a trop de prudence pour vouloir mettre son Royaume en vn si eminent peril, la fidelité de ses subjects au d'escry, son auctorité au rabais, les mauuais intentions de plusieurs, en monstre, & les maximes d'Henry le Grand en oubly, & trop d'humanité encore pour vouloir conuertir vos Villes en Cimetieres, vostre France en vn desert: finalement trop de iustice pour vouloir espandre le sang de tant de gens de bien, qui l'ont si courageusement prodigué, pour en arrouser les racines des fleurs de Lys de France, & qui n'eurent iamais plus de zele & d'ardeur qu'ils ont au seruice de V. M. & à l'obeissance qu'ils desirent rendre à ses commandemens, mais sur tout, pour euitier tous ombrages, apprehensions, & deffiances, pardonnez Sire, au zele d'un vray Chrestien, & à la franchise d'un

vray François, si j'entreprends de supplier tres-humblement V. M. le vouloir ouyr & respondre fauorablement aux tres-humbles remonstrances de ses loyaux & fideles sujets, sans l'arrester aux deffaux des formalitez: Assuré qu'ils ne desirent viure sous l'auctorité de vostre Sceptre, que pour mourir pour le soustien de vostre Couronne. Ce sont les prières, & requestes de celuy qui ne cessera de faire des vœus continuels à Dieu pour l'heureuse prosperité du regne de V. M. & continuelle benediction sur sa personne, en qualité,


SIRE, de

à Pau, ce 13.

Feurier. 1621.

Vostre tres-humble, tres-obeyssant, & tres-fidèle subject & seruiteur,

Caumont.





The image displays a dense, repeating pattern of the text "Chicago Newberry Library" in a light-colored, elegant script. The text is arranged in a diagonal grid, with each instance of the name partially overlapping the one above and to the right. The background is a dark, textured surface featuring a continuous, interlocking loop pattern, reminiscent of a chain-link fence or a decorative metal mesh. The overall effect is a sophisticated and textured bookplate design.